

SAMOA

Faatulagaina o Aiaiga

- | | |
|---|--|
| 1. Igoa puupuu ma le Amataga | 13. Faailoaina o Aia |
| 2. Faamatalaina o uiga o upu | 14. Tofiaina o Tagata faigaluega o le Pulega |
| 3. Faavaeina o le Pulega o Faailoga ma Tusi Pasi Tauloa a Samoa | 15. Aiaiga mo Tagata Faigaluega o lo o i ai nei a le Matagaluega |
| 4. Galuega tauave a le Pulega | 16. Tupe maua a le Pulega ma totogifuapauina |
| 5. Malosiaga o le Pulega | 17. Tausaga Faaletupe |
| 6. Komiti Faatino o Sui Auai | 18. Faamatalaga tau tupe, Sueina faasuetusi ma Lipoti Faaletausaga |
| 7. Sui o Sui Auai | 19. Puipuiga mai Noataga |
| 8. Totogi o Sui Auai | 20. Tuusaunoaga mai Lafoga |
| 9. Fonotaga a le Komiti Faatino | 21. Tulafono Faatonutonu |
| 10. Ofisa Sili o Pulega | |
| 11. Tuuina atu o malosiaga | |
| 12. E mafai e le Komiti Faatino ona faavae ni Komiti | |

2006, Nu. 5

O SE TULAFONO e faavae ai le Pulega o Faailoga ma Tusi Pasi Tauloa a Samoa ma ia faatonu ai ana galuega tauave, malosiaga ma tiute tauave. [3 Mati 2006]

UA FAIA e le Fono Aoao Faitulafono a Samoa i totonu o le Palemene ua potopoto e faapea:

1. Igoa puupuu ma le Amataga-(1) E mafai ona taua lenei Tulafono o le Tulafono o le Pulega o Faailoga ma Tusi Pasi Taualoa a Samoa 2006.

(2) O lenei Tulafono e amata faamamaluina i le aso e tuuina i ai le maliega a Le Ao o le Malo.

(3) O le Faasilasilaga o le amata faamamaluina o lenei Tulafono po o sona vaega po o sona fuaiupu e tatau ona lomia faasalalau i le gagana Samoa ma le gagana Peretania i le Savali ma se isi nusipepa o lo o faasalalauina i totonu o Samoa.

2. Faamatalaina o uiga o upu-(1) I totonu o lenei Tulafono, ae vagana ai ua manaomia e le mataupu se isi uiga e ese ai -

“Pulega” o lona uiga o le Pulega o Faailoga ma Tusi Pasi Taualoa a Samoa ua faavaeina i lalo o le fuaiupu 3;

“Komiti Faatino” o lona uiga o le Komiti Faatino o Sui auai ua faavaeina i lalo o le fuaiupu 6;

“Ofisa Sili o Pulega” o lona uiga o le Ofisa Sili o Pulega o le Pulega ua faavaeina i lalo o le fuaiupu 10;

“Malo” o lona uiga o le Malo o le Atunuu Tutoatasi o Samoa;

“Minisita” o lona uiga o le Minisita e nafa ma Aoga mai lea taimi i lea taimi;

“Matagaluega” o lona uiga o le Matagaluega e nafa ma Aoga mai lea taimi i lea taimi;

“Samoa” o lona uiga o le Atunuu Tutoatasi o Samoa.

(2) So o se faasinomaga i totonu o lenei Tulafono i se tulafono, ae vagana ai ua manaomia e le mataupu se isi uiga ese ai, o se faasinomaga i lenei tulafono e pei ona teuteuina, faaopoopoina le taimi, toe faamalosiā, po o ua faaaogā e po o i lalo o so o se tulafono, e aofia ai ma lenei Tulafono.

3. Faavaeina o le Pulega o Faailoga ma Tusi Pasi Taualoa a Samoa (SQA)-(1) Ua faavaeina nei se faalapotopotoga faaletulafono ua taua o le “Pulega o Faailoga ma Tusi Pasi Taualoa a Samoa” po o lona faapuupuuina o le “SQA”, lea e tatau ona i ai galuega tauave ma malosia ua faaee atu i ai i lalo o lenei Tulafono.

- (2) E tatau i le Pulega ona:
- (a) I ai se soloaiga le motusia ma se faamau faailoga;
 - (b) Mafai ona faia se moliaga ma e molia foi i lona igoa ua tuufaatasia ai faaletulafono;
 - (c) Mafai ona faia ni konekarate, mauaina, umia ma faamatuu atu meatotino moni ma meatotino tau le tagata lava ia ma ia mafai ona faia isi gaoioiga uma ma mea e pei ona mafai e faalapotopotoga ua tuufaatasia faaletulafono ona faia i se faiga faaletulafono;
 - (d) Mafai ona faatino isi pule uma ma malosiaga e tatau ai po o e faatelevave ai le faafoega talafeagai o lenei Tulafono.

(3) O le Ofisa Sili o Pulega e tatau ona tausia le faamau faailoga, lea e tatau ona faatoa faapipii i se pepa aloaia e tusa ai o se iugafono a le Komiti Faatino, ma e tatau ona faamaonia e le saini a le Taitaifono o le Komiti Faatino ma se isi sui auai e toatasi po o i le toesea ai o le Taitaifono o se sui auai e filifilia e le Komiti Faatino ma se isi sui auai e toatasi.

4. Galuega tauave a le Pulega-(1) O galuega tauave a le Pulega o le :

- (a) Tuuina atu o fautuaga tau faiga faavae i le Malo e uiga i fuafuaga faataatitia ma vaega e ave i ai le faamuamua mo aoaoga faaauau;
- (b) Mataitu ma lipoti i le Malo ma le vaega o aoaoga faaauau, e uiga i gaoioiga, tuuina atu o alaoa, ma le faatinoga atoa o galuega a le vaega o aoaoga faaauau e faasino i sini faataatia autu a le atunuu mo atinae tau le tamaoaiga, agafesootai ma le aganuu;
- (c) Tuuina atu fautuaga i le Malo ma le vaega o aoaoga faaauau e uiga i sailiiliga ma tulaga e aliae mai i suesuega, le mataituina po o iloiloga sa faatino e le Pulega po o isi lala sooupu, faalapotopotoga po o tagata;

- (d) Faamaopoopo ma faamalosia aoaoga faaauau uma, ina ia faaleleia le agai tonu atu o le vaega o aoaoga faaauau i sini o le atinae a le atunuu ma ia uunaia ma atiae vaega uma mo le faatinoina lelei o polokalame;
- (e) Unaia sootaga ma auala e aoaoina ai i le va o le vaega o aoga ma le vaega o aoga faaauau, ma ia ofoina atu ni auunaga tau fautuaga mo galuega;
- (f) Atiae faiga faapaaga i le va o i latou e i ai a latou aia i tulaga faapisinisi, alamanuia, tomai faapitoa, vaega tumaoti ma faalapotopotoga i nuu ma afioaga ma faalapotopotoga o aoga faaauau;
- (g) Galulue faatasi ma vaega o tagata i le atunuu e i ai a latou aia ina ia faamautu ai le faavaeina o tulaga aloaia ma manaoga tau aoaoga aemaise lava mo galuega tau matata eseese, tekinisia ma tomai faapitoa;
- (h) Fuafuaina o se faatulagaga a le atunuu mo faailoga ma tusi pasi tauloa a Samoa, e aofia ai le faamatalaina o uiga o fuitau ina ia faamautu ma tausia ai pea le aloaia i le atunuu ma faava o malo o faailoga ma tusi pasi tauloa faapea le tulaga mautu ma lelei o aoaoga faaauau ma faalapotopotoga tau aoaoga;
- (i) Atiae aiaiga faatulagaina ma faiga mo le faaamauina o i latou uma e tuuina atu aoga faaauau;
- (j) Atiae aiaiga faatulagaina ma faiga e talia aloaia ai faava o malo ma le susesueina o tulaga aupito manaomia o i latou uma e tuuina atu aoaoga faaauau;
- (k) Unaia tulaga aupito manaomia i aoga i totonu o nuu ma alalafaga ma polokalame tau aoaoga;
- (l) Atiae aiaiga faatulagaina ma faiga e lagolago ai le faaleleia o tulaga aupito manaomia e aofia uma ai aoaoga faaauau;

- (m) Galulue soosootauau ma faalapotopotoga uma mo aoaoga faaaauau, aemaise ia faamaonia o lo o latou faaaogāina faiga faavae o pulega aupito manaomia ma faiga e faamautuina ai o lo o mafai e faailoga ma tusi pasi taualoa ona ausia pe sili atu foi i tulaga aloaia faava o malo, ma ua ogatasi a latou polokalame ma vaega ua ave i ai le faamuamua a le atunuu;
 - (n) Galulue faatasi ma lala sooupu a malo i fafo faapea isi faalapotopotoga ina ia aloaia i totonu o Samoa ia faailoga ma tusi pasi taualoa mai fafo ma ia ausia tulaga aloaia faava o malo mo faailoga ma tusi pasi taualoa e tuuina atu i totonu o Samoa;
 - (o) Tuuina atu faamaoniga e faapea o aoaoga faaaauau i totonu o Samoa o lo o faatumauina ai le tulaga tutusa faava o malo; ma
 - (p) Faatino so o se isi galuega tauave ua faaee atu i le Pulega i lenei Tulafono po o so o se isi Tulafono, po o e talosagaina e le Malo mai lea taimi i lea taimi.
- (2) E mafai e le Pulega ona feutagai ma so o se isi tagata po o se faalapotopotoga talafeagai, i le tauaveina o ana galuega tauave.

5. Malosiaga o le Pulega-(1) E tatau i le Pulega ona i ai malosiaga e pei ona tatau ai po o e ono tulai mai i le faatinoga lelei o ana galuega tauave.

(2) E aunoa ma le afaina o le tulaga lautele o aiaiga o le faafuuiupu (1), ma i le faaopoopo atu i so o se isi malosiaga ua aiaia e lenei Tulafono, e tatau i le Pulega ona i ai malosiaga nei:-

- (a) E faatauina mai, lisi mai, toe lisi mai po o e mauaina i se isi faiga e ese ai ma umia so o se meatotino, tusa pe mafai ona feaveai pe leai, e manaomia mo le tauaveina o ana galuega tauave ma faamatuu atu so o sea meatotino ua le toe manaomia mo ia faamoemoega;
- (b) Ia atiae ona fanua ma isi meatotino ma faatu ma tausia fale po o isi fausaga;
- (c) Ia faatau mai, lisi mai, pe faatutu ni fale mo le faaaogāina e ana tagata faigaluega;
- (d) Ia ofi atu i so o se konekarate ma so o se tagata mo le tuuina atu i ai po o le tuuina atu e ia o so o se oloa po o auaunaga;
- (e) Ia totogi ai so o se tupe alu ua ia faatupulaia i se tulaga alagatau;
- (f) Ia faia, lomina faasalalau, tuuina atu, faasalalauina ma tufatufa, pe mo se tupe totogi po o se isi mafuaaga e ese ai, pe tusia i pepa, faiga faaeletoroni pe faamaneta ia lipoti, pepa, faasalalauga faavaitaimi po o isi faamatalaga e ono mafai ona fesoasoani i le tauaveina o ana galuega tauave;
- (g) Ia tuuina atu polokalame o aoaoga, faatasi ma le lagolago a isi lava tagata po o faalapotopotoga e pei ona manatu le Pulega e talafeagai ai, mo ana tagata faigaluega po o isi tagata e aofia ai i le tauaveina o ana galuega tauave;
- (h) Ia faaaogā ana meatotino, pe mafai ona feaveai pe leai, i se faiga e manatu ia e talafeagai ai, e aofia ai le faia o nonogatupe e ala i le faaaogāina o ia meatotino e ave ma faamalumu mo ia nonogatupe;
- (i) Ia faavae se polokalame tau penisione po o isi polokalame tau le tausiga mo le manuia o ana tagata faigaluega ina ia tusa ai ma faiga faavae a le malo; ma
- (j) Ia faia mea uma e mafai ona fesoasoani ai i so o sona malosiaga ma galuega tauave.

6. Komiti Faatino o Sui Auai-(1) O le Pulega e tatau ona pulea e se Komiti Faatino o Sui auai, e aofia ai sui auai e toaiva ma le Taitaifono, o ia lea e tatau ona nafa ma faiga faavae ma le pulega lautele o le Pulega.

(2) O le Komiti Faatino e tatau ona aofia ai:

- (a) Le tagata e toatasi e tofia e le Minisita e avea ma Taitaifono;
- (b) Le Ofisa Sili o Pulega e nafa ma Aoga mai lea taimi i lea taimi;
- (c) Le Ofisa Sili o Pulega e nafa ma le Leipa mai lea taimi i lea taimi;
- (d) Le Ofisa Sili o Pulega e nafa ma Tina ma Tamaitai, Nuu ma Afioaga ma Atinae o Agafesootai mai lea taimi i lea taimi;
- (e) Le Peresetene o le Asosi a le Au Gaosi Oloa ma i latou e Auina atu Oloa i Fafu o Samoa; ma
- (f) Le Peresetene o le Faalapotopotoga a le Aufaipisinisi ma Alamanuia;
- (g) Le Tagata e toatasi e tofia e le Minisita e avea ma sui o le Iunivesite Aoao o Samoa;
- (h) Le tagata e toatasi e tofia e le Minisita e avea ma sui o Aoga Tumaoti ma faalapotopotoga; ma
- (i) Le Ofisa Sili o Pulega o le Pulega.

(3) So o se tagata ua tofia e avea ma sui auai e tusa ai o le faafuaiupu (2)(a), (g) ma le (h) e tatau ona:

- (a) Aveesea mai le tofi e le Minisita ona ua le atoa le malosi o le tino ma le mafaufau, le lelei le faatinoga o galuega, gaumativa, faatamala i tiute tauave, amio le pulea po o ua tuua Samoa e le toe foi mai;
- (b) I le noatia ma le fai fuafua i le parakalafa (a), e umia le tofi mo se vaitaimi e tolu tausaga ma e mafai ona agavaa mo le toe tofia; ma
- (c) E agavaa e faamavae mai le tofi e ala i le auina atu o se faasilasilaga tusitusia o lena tulaga i le Minisita.

(4) E mafai e le Komiti Faatino ona tofia e avea ma sui so o se tagata e fesoasoani i le Komiti Faatino i so o sana fonotaga, ae vagana ai e faapea o sea tagata ua tofia e avea ma sui e le tatau ona i ai le aia tatau e palota ai i so o se fonotaga a le Komiti Faatino.

7. Sui o Sui Auai-(1) Afai e i ai se sui auai o le Komiti Faatino ua le mafai ona galue mo se taimi le tumau mo so o se mafuaaga tatau mai le auai i se fonotaga a le Komiti Faatino, e mafai e sea sui auai, e ese mai i le Taitaifono, ona faatagaina se tagata ofisa sinia mai le latou Matagaluega, lala sooupu, kamupani po o le faalapotopotoga, i le a lava le tulaga e i ai, ina ia auai i lena fonotaga e avea ma sui o sea sui auai.

(2) So o se sui i le taimi o galue ai i sea tulaga, e tatau ona avea e faapea o se sui auai o le Komiti Faatino.

(3) O le tofiaina o so o se sui o se sui auai, ma so o se gaoioiga ua faia e le sui i le avea ai o se sui auai o le Komiti Faatino e tatau ona:

- (a) Le fesiligia i so o se tualumaga i luga o le mafuaaga e faapea o le taimi mo le tofiaina o le sui e le i tulai mai po o ua faamutaina;
- (b) Le avea o se mafuaaga e faalēaogā ai faaiuga a le Pulega sa faia a o faagasolo so o se fonotaga lea sa faapea sa galue ai lea sui e pei ona tofia.

8. Totogi o Sui Auai - O Sui auai ma sui o sui auai o le Komiti Faatino e tatau ona totogiina i ia totogi, alauni o fonotaga, tupe alu i malaga ma isi tupe alu e mafai ona faatulaga e le Kapeneta mai lea taimi i lea taimi.

9. Fonotaga a le Komiti Faatino-(1) E mafai e le Taitaifono ona valaau fonotaga a le Komiti Faatino ina ia faia i taimi uma e pei ona manaomia ia taimi ma ia nofoaga e pei ona o le a fuafuaina e le Taitaifono mai lea taimi i lea taimi ae vagana ai e faapea:

- (a) E tatau i le Komiti Faatino ona fono a itiiti mai o le tasi i masina e lua;

(b) I luga o se talosaga tusitusia a nisi sui auai o le Komiti Faatino a itiiti mai o le toalua, e tatau i le Ofisa Sili o Pulega ona valaau se fonotaga a le Komiti Faatino i se aso e le silia le 14 aso talu ona taulimaina le talosaga.

(2) O le numera o sui auai e tatau ona i ai e mafai ai ona faia se fono i fonotaga uma a le Komiti Faatino e tatau ona lima sui auai.

(3) So o se mataupu e faatulai mai i se fonotaga a se Komiti Faatino e tatau ona faia i ai se faaiuga e se vaega fulisia o sui auai o lo o auai ma palota, ma i le tulaga o palota tutusa, e tatau i le Taitaifono ona i ai se palota e faia ai se faaiuga.

(4) E tatau ona tuuina atu poloaiga ma faatonuga uma a le Komiti Faatino i lalo o le saina a le Ofisa Sili o Pulega po o, i le toesea ai o le Ofisa Sili o Pulega e se sui auai ua faatagaina patino ma tofia e le Komiti Faatino.

(5) E tatau i le Komiti Faatino ona tausia lelei ootoga o mataupu o ana taulumaga i fonotaga.

(6) E tatau ona taitaia e le Taitaifono ia fonotaga taitasi uma a le Komiti Faatino, po o i le toesea ai o le Taitaifono, e se sui auai ua filifilia e le Komiti Faatino ina ia taitaia le fonotaga.

10. Ofisa Sili o Pulega-(1) I le noatia ma le fai fuafua i aiaiga o so o se faiga faavae a le Malo e pei ona faamamaluina mai lea taimi i lea taimi, e mafai e le Komiti Faatino, ina ua ia mauaina le faamaoniga a le Kapeneta, ona tofia se Ofisa Sili o Pulega o le Pulega i luga o ia tuutuuga ma aiaiga e pei ona ia manatu ua talafeagai.

(2) O le Ofisa Sili o Pulega e tatau ona avea o le Ofisa Sili o Pulega o le Pulega ma e tatau ona faaopoopo i ai le faatinoga o isi ia galuega tauave ma le faatinoina o isi malosiaga e pei ona ua faaee atu i ai mai lea taimi i lea taimi e lenei Tulafono po o so o se isi Tulafono po o tulafono faatonutonu.

(3) E mafai e le Ofisa Sili o Pulega, faatasi ai ma le faamaoniga a le Komiti Faatino, ona tuuina atu i se tagata faigaluega o le Pulega le faatinoga o so o se galuega tauave a le Ofisa Sili o Pulega po o le faatinoina o so o se malosiaga o le Ofisa Sili o Pulega.

(4) E mafai ona aveeseina pe faamalolo le tumau mai le tofiga le Ofisa Sili o Pulega e le Komiti Faatino mo ni mafuaaga tatau ma e tatau ona agavaa mo le toe tofiaina i le muta ai o vaitaimi o le tofiga.

(5) I le tulaga ina ua le mafai ona toe galue, toesea, aveeseina po o le faamaloloina le tumau mai le tofiga o le Ofisa Sili o Pulega, e tatau i le Komiti Faatino ona tofia se isi tagata ina ia galue e avea o le Sui Ofisa Sili o Pulega i lalo o lenei Tulafono seia tofia le Ofisa Sili o Pulega po o ua toe amata i lona tofi.

11. Tuuina atu o malosiaga-(1) E mafai e le Komiti Faatino, i se tulaga lautele po o e pei ona aiaia se isi tulaga e ese ai i le faiga e faatino ai le tuuina atu o malosiaga i lalo o lana faamau faailoga, ona tuuina atu i le Ofisa Sili o Pulega po o i se tasi o ona sui auai, so o se tasi o ona malosiaga ma malosiaga o le Pulega i lalo o lenei Tulafono, e ese mai i lenei malosiaga na tuuina atu ai.

(2) Afai o se malosiaga e tuuina atu i lalo o le faafuaiupu (1) e faasino i le tuuina atu o se laisene po o tusi faamaonia, e le tatau i le Ofisa Sili o Pulega ona tuuina atu lea laisene po o tusi faamaonia vagana ua tusa ai ma tuutuuga o le tuuina atu o malosiaga, faatonuga, taiala po o aiaiga ua faaeeina atu i ai e le Komiti Faatino.

(3) E tatau i se malosiaga ua tuuina atu i lalo o le faafuaiupu (1), ina ua faatinoina e le Ofisa Sili o Pulega, ona faatatauina e faapea sa faatinoina e le Pulega.

(4) O le tuuina atu o malosiaga i lalo o lenei fuaiupu e le taofia mai ai le faatinoina o so o se malosiaga e le Komiti Faatino.

(5) O se tuuina atu o malosiaga i lalo o lenei fuaiupu e faaleaogāina i le faitalia a le Komiti Faatino.

12. E mafai e le Komiti Faatino ona faavae ni Komiti-(1)

E mafai e le Komiti Faatino ona faavae ni komiti faapitoa ma e mafai ona ia tuuina atu i so o sea komiti so o se mataupu mo le iloiloaina, sutesueina po o le faafoeina.

(2) E mafai e le Komiti Faatino e ala i se iugafono faapitoa i so o sana fonotaga ona faaogā tulafono faafoe tusitusia o tualumaga mo ia komiti.

13. Faailoaina o Aia-(1)

E tatau i se sui auai o le Komiti Faatino o ia lea e i ai sana aia tuusao pe le tuusao po o aia tau tupe a le sui auai lava ia i so o se mataupu e oo atu i luma o le Komiti Faatino, i taimi taitasi ma taimi uma e oo mai ai le mataupu i luma o le Komiti Faatino, ma i le taimi lava e mafai ai talu ona oo mai ia faamatalaga moni talafeagai i le silafia e le sui auai, ona faailoaina atu a latou aia i le mataupu.

(2) I le noatia ma le fai fuafua i le faafuaiupu (3), e tatau ona faamauina le faailoaina o aia i lalo o le faafuaiupu (1) i totonu o oototoga o tualumaga o fonotaga a le Komiti Faatino ma e le tatau i le sui auai ona:

- (a) Auai i totonu o le faagasologa o so o se faatalanoga a le Komiti Faafoe e faatatau i lea mataupu; ma
- (b) Auai i so o se faatalanoaga po o se palota a le Komiti Faatino e tusa ai o lea mataupu.

(3) Afai ona o se taunuuga i le faaogāina o le faafuaiupu (2) ua le mafai e le Komiti Faatino ona tausisia se numera o sui usufono e mafai ona faia se fonotaga ina ia faia ai se faaiuga o se mataupu, e mafai e le sui auai po o sui auai o le Komiti Faatino o lo o aafia ai, ina ua uma ona usitaia le faafuaiupu (1), ona auai i so o se iloiloaga a le Komiti Faatino e faatatau i le mataupu ma e mafai ona palota i le mataupu ma e tatau ona faamauina i totonu o oototoga o mataupu o tualumaga o le fonotaga a le Komiti Faatino le mafuaaga o le auai o le sui auai po o o sui auai ua aafia i so o se iloiloaga ma palota.

14. Tofiaina o Tagata faigaluega o le Pulega-(1) I le noatia ma le fai fuafua i aiaiga o le faiga faavae a le Malo e pei ona faamamaluina mai lea taimi i lea taimi, e mafai e le Pulega ona tofia, i ia totogi ma i luga o ia tuutuuga ma aiaiga e pei ona ia manatu ua talafeagai ai, ia tagata faigaluega, sooupu, faufautua po o tagata faufautua e pei ona ia manatu e manaomia mo le faataunuaina lelei ma le atoatoa o ana galuega tauave ma e mafai ona ia faateaina so o sea tagata faigaluega, sooupu, faufautua po o tagata faufautua e pei ona fuafuaina e le Pulega.

(2) E mafai e le Pulega ona faia tulafono faafoe mo le faatonutonuina faaletulafono o tuutuuga o auaunaga, amio pulea ma aoaoga o tagata uma o lo o faafaigaluegaina e po o faigaluega e avea ma sui o le Pulega.

(3) E tatau i tagata faigaluega ma isi tagata o lo o faia faatinoga e avea ai ma sui o le Pulega ona tali atu i ma e i lalo o le faafoega a le Ofisa Sili o Pulega.

15. Aiaiga mo Tagata Faigaluega o lo o i ai nei a le Matagaluega-(1) I le amata faamamaluina o lenei Tulafono, o tagata faigaluega taitasi uma a le Matagaluega e fesootai ma le faatinoga o galuega tauave a le Pulega ma o ia lea na filifilia e le Minisita i se faiga tusitusia, e tatau ona:

(a) Faaauau ona faafaigaluegaina e le Pulega i luga o ia tuutuuga ma aiaiga e pei ona mafai ona malilie faatasi uma i ai lea tagata faigaluega ma le Pulega a o lumanai ai le faamamaluina o lenei Tulafono; po o

(b) E mafai ona malolo litaea pe faamalolo litaea mai auaunaga i luga o ia tuutuuga e pei ona mafai ona faia i ai se faaiuga e tusa ai ma tulafono.

16. Tupe maua a le Pulega ma totogifuapauina-(1) O tupe maua a le Pulega e tatau ona aofia ai:

(a) Ia totogifuapauina, tau faaee atu ma faasalaga tau tupe e tatau ona totogiina i lalo o lenei Tulafono po o so o se isi Tulafono po o tulafono faatonutonu e pei ona ua mafai ona tuuina atu i le Pulega i lenei Tulafono po o tulafono faatonutonu;

- (b) Tupe faameaalofa e pei ona mafai mai lea taimi i lea taimi ona tuuina atu i ai e le Malo;
- (c) Nisi lava tupe e pei ona mafai ona faatupulaia i se tulaga talafeagai mo le Pulega mai i so o se isi alatupe.

(2) Ina ia tusa ai ma so o se faiga faavae a le Malo ma so o se tulafono talafeagai, e mafai e le Pulega ona teu faafaigaluega so o se vaega o ana tupe ia e le o manaomia i le taimi lea mo le faataunuaina o ana galuega tauave.

(3) E mafai e le Pulega ona faaee atu se totogifuapauina e tusa ai o tau sa faatupulaia i se tulaga talafeagai i le faatinoga o ana tiute tauave i lalo o lenei Tulafono po o so o se isi Tulafono.

17. Tausaga Faaletupe - O le Tausaga Faaletupe a le Pulega e tatau ona amata i le aso 1 o Iulai o tausaga taitasi ma e tatau ona faaiuina i le aso 30 o Iuni o le tausaga mulimuli ane ai, ae vagana ai e faapea o le tausaga faaletupe muamua a le Pulega e tatau ona amata i le aso e faamamalu ai lenei Tulafono ma e tatau ona faaiuina i le aso 30 o Iuni e mulimuli ane ai.

18. Faamatalaga tau Tupe ma Lipoti Faaletausaga-(1)
E tatau i le Pulega ona tausia ni faamatalaga tau tupe atoatoa ma faamaumauga o feuaiga faapisinisi ma mataupu a le Pulega ma e tatau ona faia mea uma e manaomia ina ia faamautu ai e faapea:

- (a) O vaegatupe uma e maua ua faamauina i totonu o faamatalaga tau tupe;
- (b) O tupe totogi uma ua i ai faamaoniga tatau ma sao ona faia ma faamaumauina mo; ma
- (c) O lo o i ai puipuiga e atoatoa a le Pulega i ana:
 - (i) meatotino;
 - (ii) meatotino i lalo o le faafoega a le Pulega;
 - (iii) tupe alu a le Pulega; ma
 - (iv) noataga.

(2) E tatau ona noatia le Pulega i aiaiga o le Tulafono o Pulega o Tupe a le Malo 2001 ma mo lenei faamoemoe, e ui

lava o aiaiga o lea Tulafono, e tatau i tupe ua maua e le Pulega ona faatatauina e faapea o tupe a le Malo ma o aseta ma meatotino a le Pulega e tatau ona faatatauina e faapea o meatotino a le Malo.

(3) E tatau i le Pulega ona faia ma tuuina atu i le Minisita, i totonu o le ono (6) masina i le tuanai ai o le faaiuga o le tausaga faaletupe a le Pulega, se lipoti faaletausaga o lo o o aofia ai:

- (a) Faamatalaga tau tupe mo le tausaga faaletupe;
- (b) Faailoga e iloa ai le faatinoga o galuega ma ia faamatalaga e pei ona mafai ona faatonuina e le Minisita o Tupe;
- (c) Se lipoti e uiga i le faagaoioiga o le Pulega a o faagasolo le tausaga faaletupe ua tuanai atu; ma
- (d) Nisi lava faamatalaga e pei ona mafai ona manaomia e le Kapeneta.

(4) O faamatalaga o tupe ua faasinomia i le faafuuiupu (3) e tatau ona saunia ma e tatau ona aofia ai:

- (a) Se faamatalaga o feuiaiga faapisinisi tau tupe a le Pulega mo le tausaga faaletupe;
- (b) Se faamatalaga o le tulaga tau tupe o le Pulega i le faaiuga o le tausaga faaletupe; ma
- (c) Faamatalaga talafeagai ma atoatoa e uiga i faamatalaga tau tupe.

(5) O faamatalaga o tupe ua faasinomia i totonu o le faafuuiupu (3) e tatau ona:

- (a) Tuuina atu i ai se tulaga sagatonu ia feuiaiga faapisinisi tau tupe a le Pulega a o faagasolo le tausaga faaletupe lea e faasino i ai; ma
- (b) Tuuina atu ai i se tulaga sagatonu le tulaga tau tupe o le Pulega i le faaiuga o le tausaga faaletupe.

(6) E tatau i le Pulega, i totonu o le fa (4) masina i le tuanai ai o faaiuga o tausaga faaletupe taitasi uma, ona faia ina ia tuuina atu i le Pule ma Suetusi Sili mo le sueina faasuetusi o faamatalaga tau tupe ma isi faamatalaga e manaomia i lalo o lenei fuaiupu.

(7) E tatau i le Minisita ona ia faataatia i luga o le laulau a fono a le Palemene le lipoti faaletausaga a le Pulega faatasi ai

ma le lipoti a le Pule ma Suetusi Sili i faamatalaga tau tupe a le Pulega i totonu o le 14 aso fono talu ona mauaina le lipoti faasuetusi a le Pule ma Suetusi Sili.

19. Puipuiga mai Noataga-(1) E leai se moliaga e tatau ona faia faasaga i le Malo, le Minisita, le Pulega, le Ofisa Sili o Pulega po o so o se sui auai o le Komiti Faatino, tagata faigaluega po o se sui sooupu o le Pulega po o so o se tagata o lo o galue e tusa ai o so o se pule ua faaee i ai e le Pulega po o le Ofisa Sili o Pulega, po o le a lava le tulaga e mafai ona oo i ai, e tusa ai o so o se gaoioiga po o mataupu ua faia po o ua le faia i le loto lelei i le faatinoina po o le faamoemoe e faatinoina a latou galuega tauave taitasi ua faaee atu i ai e po o i lalo o lenei Tulafono po o so o se tulafono faatonutonu ua faia i lalo o ia mea.

(2) O tau o loia mo le tali atu i so o se tagi ua faia faasaga i le Minisita, le Ofisa Sili o Pulega po o so o se sui auai o le Komiti Faatino, tagata faigaluega po o se sooupu o le Pulega po o so o se tagata ua galue e tusa ai o so o se pule ua faaee atu i ai e le Pulega po o le Ofisa Sili o Pulega, po o le a lava le tulaga e i ai, e mafai ona tauaveina e le Pulega.

20. Tuusaunoaga mai Lafoga - Mo faamoemoega o le Tulafono o Lafoga o Tupe Maua 1974, ua faatatauina le Pulega e faapea o se faalapopotoga ua faavaeina faapitoa mo galuega fesoasoani faameaalofa ma, e tusa ai o lea tulaga, o tupe maua a le Pulega e tatau ona tuusaunoa mai lafoga.

21. Tulafono Faatonutonu-(1) E mafai e Le Ao o le Malo mai lea taimi i lea taimi, i luga o le fautuaga a le Kapeneta, ona faia ia tulafono faatonutonu e pei ona tatau ai po o le talafeagai mo le faamoemoe o le tauaveina po o le faamamaluina atoatoa o aiaiga o lenei Tulafono.

(2) E aunoa ma le faatapulaaina o uiga lautele o le faafuaiupu (1), e mafai ona faia tulafono faatonutonu mo faamoemoega o le:

- (a) Faatonuina o pepa mo tusi faamaonia, laisene, faasilasilaga, faamaoniga po o so o se isi mataupu i lalo o lenei Tulafono;

- (b) Faatonuina o totogifuapauina e tatau ona totogi ma le fua faatatau e fuafuaina ai ia totogifuapauina, ma aiaia ai mo le toe faaolaina ma le faaaogāina o ia totogifuapauina, e tusa ai o so o se mataupu i lalo o lenei Tulafono; ma
 - (c) Le faia o solitulafono ma faasalaga mo le faia o na solitulafono e oo atu i le tulaga aupito maualuga e 100 iunite tau faasalaga.
- (3) E tatau i le Pulega ona faaaogāina pepa ua faatonuina i lalo o le faafuaiupu (2), peitai e leai se mea i totonu o lenei fuaiupu e tatau ona taofia ai le Pulega mai le faaaogāina po o le manaomia o le faaaogāina o pepa ua faamaonia e le Komiti Faatino, pe afai e leai se pepa talafeagai sa faatonuina.

O le Tulafono o le Pulega o Faailoga ma Tusi Pasi Taualoa a Samoa 2006 o lo o faafoeina e le Matagaluega o Aoga, Taaloga ma Aganuu.